



Tortuga bay, la pli biala riva dall'insla Santa Cruz.



La vesta el lontan dil desiart da sal ad Uyuni.



La laguna Tijeretas silla insla San Christobal, Galapagos.



La rendida dil sulegl alla riva Ipanema.

L'America latina

DAD ANGELICA CARIGIET

■ **Natira nundetg imposanta, glieud amicabla e da magliar extraordinari. Il viadi entscheiva miez matg a Peru.** Sil program stattan dus meins America latina. Aschia ch'ins astga segir buca munchentar dad ir sil Macchu Picchu. La miraglia da crap regorda aunc oz vid il pievel anzian dils Inkas. Ils Inkas possedevan il pli grond imperi, il qual els numnavan «Tawantinsuyu», tgei che munta «la tiara dallas quatter valladas».

Salar de Uyuni

Naven da plus 25 grads celsius cuntinue-scha nies viadi en in liug nua che la temperatura sesbassa durant la notg sin mi-



La statua da Cristus sil Corcovado a Rio de Janeiro.

nus quendis grads. Il desiart da sal a Bolivia. Cheu eis ei buca d'impurtonza nua ch'ins mira, pertgei tut tgei ch'ins vesa ei planira alva. Quest desiart da sal ei il pli grond dil mund e mesira dapli che 10 000 kilometers quadrat. Traversar el cun auto ei perquei ina detga sfida.

Rio de Janeiro

Cheu ei buca pli la ferdaglia in tema, mo-bein la criminalitad, pertgei Rio de Janeiro ei in dils pli malsegirs marcaus dil mund. Denton sentan ins buca quei e cun in saung giudezi duess era nuot schabegiar. Ei fuss denton bia memia donn da buca visitar il marcau da Brasilia per quei motiv. Il marcau porscha bialas rivas, cuolms contonschibels cun pendicu-



Il viadi tier la laguna Tijeretas.

FOTOS A. CARIGIET

laras, vestas spectacularas sur il marcau e capeivlamein aunc ina miracla dil mund, la secunda sin quest viadi, la statua da Cristus sil Corcovado.

Inslas Galapagos

Naven dalla massa da glieud ora tier ina gruppa dad inslas solias el Pacific. Vias naturalas, luschars al maun dils trutgs, tartarugas selvadias, flora e fauna nundisada. Buca per nuot enconuscent sco in dil pli bials loghens. Ed a tgi che la purschida dalla natira ella tiara tonscha buc, lez sfundra ella natira sut l'aua. Tgauns dall'aua, tartarugas, rajass, pèschs e curalass gaglias. Definitivamein il davos liug nua ch'ins lai enrescher per nos cuolms e per la tschugalata!

La stad ei stada buna

DAD ASA S. HENDRY

■ **Dapi tschun dis hai jeu buca pli tschintschau cun in auter carstgaun. Dapi dus dis ei igl akku da miu handy vits, ei plova, il mini panel da solar lavura buc.** Miu tgiarp vesa ora sco quel dad ina vacca da latg suenter siu siatavel vadi e mia schientscha sedissolva plaunsiu en quella dad ina creatira jastra. Miu tgaun mira sin mei. El mira tier co jeu level bufatg dalla sutga e setegnel vid la canta dalla meisa per star en pei. El vesa co jeu ballontschel vi tier la pegna e mettel en dus, treis lenns. Sche mo il sulegl turnass. In di sestenda ella perpetnadad.

Las empremas jamnas hai jeu cuschiu, lu hai jeu entschiet a tschintschar cun ils animals, lu cun ils cuolms e la finfinala schizun cun memezza. La cuntrada selvadia tschetscha, ella tschetscha vid las atgnas forzas da miu tgiarp e las forzas da mia schientscha. Jeu scolel il tgaun cura ch'ieu patratgel vid tut quels ch'han gavischau a mi ina buna stad, jeu duessi se-revegnir e guder. Ed en quei mument sun jeu nundetg schalusa da tut la glieud che passenta la stad giu ella val, che sesque-

tscha ellas badis pleinas e ch'ha temps da seser ensemen durant las seras cauldass e spitgar la notg.

Las pastiras dall'alp van si tochen 2600 m s.m. Cheu ein ins pli datier al sulegl e l'aria ei fina. Las plauncas ein selvadias ed aschিপrest ch'ieu audel il ramplunar da crappa paraliseschel jeu per secundas. La crappa che vegn da sisum diltut seglia cun il catsch da trens giu ella val. Las punts da lavinas ein grondas questa stad ed ei varga buc in di senza che nus stoppien traversar ellas. Pass precauts e plauns. Mo inagada sfracca la neiv, aschia ch'ina mesadad dalla muntanera da nuorsas resta anavos ed entginas eis ei schizun da pescar ord il flum. Nuorsas senodan bein – la launa tegn ellas alla surfatscha sco in plumatsch d'aria.

E durant ch'ieu tagliel la marca ord l'ureglia dad ina cadaver che senoda en ovs da mustgas e viarms sedamondel jeu tgei ch'ieu vegnel a rispunder a quels che damondan igl atun suenter mia stad. Cheu mirel jeu si encenter il sulegl da miezdi, vesel co il tschiel semischeida cun la neiv dils pézs e stoi entscheiver a rir dad ault e da cor.



In di da nebla si d'alp.

FOTO FLAVIA HENDRY